

ПРИМЉЕНО: 08.07.2024

14:02h

Republika Srbija
Narodna skupština
8. jul 2024. godine
Beograd

Орг. јед.	Број	Прилог	Вредност

P R E D S J E D N I K U
N A R O D N E S K U P Š T I N E

Na osnovu člana 107. stav 1. Ustava Republike Srbije („Službeni glasnik RS“, broj 98/2006 i 115/2021), člana 40. stav 1. tačka 1. Zakona o narodnoj skupštini („Službeni glasnik RS“, broj 9/2010) i člana 150 stav 1. Poslovnika Narodne skupštine („Službeni glasnik RS“, broj 20/2012 – prečišćen tekst) podnosimo **PRIJEDLOG REZOLUCIJE O GENOCIDU U SREBRENICI**, s prijedlogom da se donese po hitnom postupku, u skladu sa članom 167. Poslovnika Narodne skupštine Republike Srbije.

NARODNI POSLANICI


Ahmedin Skrijelj


Selma Kučević


Šaip Kamberi

Polazeći od Rezolucije Generalne skupštine Ujedinjenih naroda 78/282 o Međunarodnom danu promišljanja i sjećanja na genocid u Srebrenici od 23. maja 2024. godine

Ističući privrženost duhu i normama Univerzalne deklaracije Ujedinjenih naroda o ljudskim pravima, Pakta o građanskim i političkim pravima, Europske konvencije o zaštiti ljudskih prava i osnovnih sloboda, Dopunskih protokola iz Ženevske konvencije o zaštiti žrtava u oružanim sukobima, Konvencije o spriječavanju i kažnjavanju zločina genocida i Statuta Međunarodnog krivičnog suda,

Poštujući i prihvatajući presude Međunarodnog krivičnog suda za bivšu Jugoslaviju, Međunarodnog rezidualnog mehanizma za krivične sudove, a naročito presudu Međunarodnog suda pravde, glavnog pravosudnog organa Ujedinjenih naroda, donijetu 26. februara 2007. godine u sporu po tužbi Bosne i Hercegovine protiv Srbije, kao pravne nasljednice Savezne Republike Jugoslavije i Državne zajednice Srbija i Crna Gora,

Rukovodeći se potrebom osiguranja trajnog i stabilnog mira i vraćanja povjerenja između država i naroda na prostoru bivše SFRJ,

Obavezujući se na poštovanje teritorijalnog integriteta i suvereniteta Bosne i Hercegovine, kao i drugih država na prostoru Zapadnog Balkana,

Imajući u vidu značaj suočavanja sa prošlošću u cilju pomirenja između srpskog i bošnjačkog naroda, ali i drugih naroda sa prostora bivše SFRJ

Proklamujući vrijednosni sud o genocidu, etničkom čišćenju, ratnim zločinima i upotrebi sile za ostvarenje političkih ciljeva

Izražavajući najdublji pijetet prema svim žrtvama genocida, ratnih i drugih zločina na prostoru bivše SFRJ, te prepoznajući prijetnju koju zločini iz mržnje predstavljaju za nacionalnu i regionalnu sigurnost

Naglašavajući da je krivica za genocid, ratne i druge zločine individualna i da nijedan narod ne može biti kolektivno označen kao genocidan ili zločinački

Afirmišući koncesiju i univerzalizam nasuprot averziji i antagonizmu a aktivnu životnu koegzistenciju nasuprot konfrontaciji

Pozivajući se na deklaraciju Narodne skupštine Republike Srbije o osudi zločina u Srebrenici od 31. marta 2010. godine, te na potrebu njenog potpunog usaglašavanja sa relevantnim međunarodnim presudama i dokumentima

Narodna Skupština Republike Srbije, na osnovu člana 99. stav 1. tačka 7. Ustava Republike Srbije i člana 8. stav 1. Zakona o narodnoj skupštini, donosi

REZOLUCIJU
O
GENOCIDU U SREBRENICI

1. Narodna skupština Republike Srbije najoštrije osuđuje genocid počinjen nad bošnjačkim narodom u Srebrenici jula 1995. godine.
2. Proglašava se 11. jul za Dan sjećanja na genocid u Srebrenici. Dan sjećanja na genocid u Srebrenici obilježava se svake godine.
3. Narodna skupština Republike Srbije izražava saučešće i izvinjenje porodicama žrtava zbog toga što Republika Srbija nije učinila sve da spriječi genocid u Srebrenici, procesuirala i kazni počinioce, ujedno se izražava saosjećanje i za sve žrtve u ratovima na prostoru bivše SFRJ, kao i za njihove porodice.
4. Republika Srbija će svojim krivičnim zakonodavstvom osigurati adekvatnu kažnjivost za negiranje genocida u Srebrenici, ratnih i drugih zločina utvrđenih presudama relevantnih međunarodnih sudova, te kažnjivost za glorifikaciju pojedinaca i organizacija koji su od strane relevantnih međunarodnih sudova oglašeni krivim za genocid u Srebrenici, ratne i druge zločine.

5. Potvrđuje se riješenost Republike Srbije da spriječi genocid i sve druge zločine i potvrđuje stavove završnog dokumenta Svjetskog Samita iz 2005. godine i odgovornosti za zaštitu stanovništva od genocida, ratnih zločina, etničkog čišćenja i zločina protiv čovječnosti.
6. Garantuje se ratifikacija i puna implementacija Konvencije o spriječavanju i kažnjavanju zločina genocida, ratnih zločina, etničkog čišćenja i zločina protiv čovječnosti i usvajanje zakona potrebnih za ispunjavanje obaveza iz te Konvencije.
7. Republika Srbija će korišćenjem svih raspoloživih sredstava i mehanizama provesti istragu i procesuirati sve odgovorne za genocid u Srebrenici.
8. Naglašava se suštinski značaj pomirenja koje je zasnovano na dijalogu, suočavanju sa prošlošću i posvjedećenosti pravdi i podršci žrtvama, kao osnovi za jačanje sigurnosti, stabilnosti i prosperiteta u regionu.
9. Republika Srbija će razvijati obrazovne programe, koji će budućim generacijama usaditi lekcije o svim negativnim posljedicama koje su proistekle iz genocida, ratnih zločina, etničkih čišćenja i zločina protiv čovječnosti u cilju spriječavanja njihove glorifikacije koje nesumnjivo dovode do stvaranja svijesti da se interesi sopstvenog naroda i države mogu ostvarivati na štetu drugog naroda i države.
10. Narodna skupština Republike Srbije potvrđuje značaj lekcije o neuspjehu da se spriječi genocid u Srebrenici, kao što je navedeno u izvještaju Generalnog sekretara UN-a u skladu sa rezolucijom Generalne skupštine 53/35 i odlučuje da rano i efikasno djeluje kako bi se spriječilo ponavljanje genocida i u tu svrhu će se iskoristi sva raspoloživa sredstva.
11. Republika Srbija potvrđuje da kršenja ljudskih i manjinskih prava mogu biti rani pokazatelj mogućnosti genocida i u tom smislu se obavezuje na usvajanje zakonskih i drugih pravno obavezujućih akata koja će nedvosmisleno garantovati zaštitu i puno ostvarivanje ljudskih i manjinskih prava i obezbijediti manjinama uslove za ostvarivanje prava na političku egzistenciju.

Ovu Rezoluciju objavit u Službenom glasniku Republike Srbije

O B R A Z L O Ź E N J E

I USTAVNI OSNOV ZA DONOŠENJE REZOLUCIJE

Ustavni osnov za donošenje ove rezolucije sadržan je u članu 99. stav 1. tačka 7. i stav 2. Ustava Republike Srbije, kojim je propisano da Narodna skupština donosi zakone i druge opće akte iz nadležnosti Republike Srbije i da vrši druge poslove određene Ustavom i zakonom, kao i u članu 8. stav 1. Zakona o Narodnoj skupštini ("Službeni glasnik RS", broj 9/10), kojim je, između ostalog, propisano da Narodna skupština donosi rezoluciju.

II RAZLOZI ZA DONOŠENJE REZOLUCIJE

Donošenje Rezolucije o genocidu u Srebrenici ima za cilj da se u Narodnoj skupštini Republike Srbije napravi prvi važan korak u pravcu rješavanja otvorenih pitanja između Srbije i Bosne i Hercegovine, te srpskog i bošnjačkog naroda.

Generalna skupština Ujedinjenih naroda, 23. maja 2024. godine, donijela je Rezoluciju 78/282 o Međunarodnom danu promišljanja i sjećanja na genocid u Srebrenici. Navedenom Rezolucijom 11. jul je proglašen kao Međunarodni dan promišljanja i sjećanja na genocid nad bošnjačkim narodom u Srebrenici jula 1995. godine.

Uzimajući u obzir navedenu činjenicu te i to da je Međunarodni sud pravde presudom od 26. februara 2007. godine poglasio Srbiju krivom jer nije spriječila genocid u Bosni i Hercegovini i nije kaznila počinioce, čime je Srbija postala prva država koja je proglašena krivom za kršenje Konvencije UN o sprječavanju i kažnjavanju genocida.

Donošenjem pravosnažnih presuda Međunarodnog suda pravde i Međunarodnog krivičnog suda za bivšu Jugoslaviju, te prihvatanjem i poštovanjem pravosnažnih presuda Radovanu Karadžiću, Ratku Mladiću, Zdravku Tolimiru, Radislavu Krstiću, Dragu Nikoliću, Ljubiši Beari, Vujadinu Popoviću, Miloradu Trbiću, Radomiru Vukoviću i ostalima, stvoreni su svi uslovi da se

usvajanjem ove Rezolucije personalizuje odgovornost i krivica za počinjen genocid, kao i uloga osuđenih ratnih zločinaca u udruženom zločinačkom poduhvatu.

Imajuću u vidu donošenje i pravnosnažnih presuda Međunarodnog rezidualnog mehanizma za krivične sudove u Hagu, izrečene zvaničnim funkcionerima Republike Srbije, Jovici Stanišiću i Franku Simatoviću, koji su proglašeni krivim za učestvovanje u udruženom zločinačkom poduhvatu, te zločinima počinjenih u Bosni i Hercegovini posebno naglašavaju razloge za usvajanje i implementaciju predložene Rezolucije kao odgovoran korak prema budućnosti države i svih njenih građana.

Usvajanjem Rezolucije otvara se prostor za neophodnu implementaciju Konvencije o sprječavanju i kažnjavanju zločina genocida, ratnih zločina, etničkog čišćenja i zločina protiv čovječnosti kao i usvajanje zakona potrebnih za ispunjavanje obaveza iz te Konvencije.

Donošenjem ove Rezolucije Republika Srbija, se nedvojbeno svrstava na stranu civiliziranih država koje promovišu demokratske vrijednosti, ljudska prava, temeljne slobode i suživot, kao najveće vrijednosti društva te skida kolektivnu odgovornost sa cjelokupnog srpskog naroda za genocid počinjen nad bošnjačkim narodom u Srebrenici.

Priznavanje genocida u Srebrenici je civilizacijski korak koji je potreban Republici Srbiji kako bi potvrdila ozbiljnost u namjeri za izgradnju dijaloga, saradnje, povjerenja i trajnog mira u regionu zasnovanom na istini, prihvatanju dela iz prošlosti, suočavanju sa prošlošću i posvećenosti pravdi, podršci žrtvama kao osnovi za jačanje sigurnosti, stabilnosti i prosperiteta u regionu.

Donošenjem ove Rezolucije proklamuje se i vrijednosni sud o genocidu počinjenom nad bošnjačkim narodom.

Insistirajući na poštovanju utvrđenih činjenica, na pravnoj i moralnoj osudi odgovornih za genocid nad Bošnjacima u Srebrenici, ova Rezolucija predstavlja i jasno distanciranje od politike etničkog čišćenja, negiranja zločina i sistemske zaštite odgovornih za genocid i druge zločine počinjene nad bošnjačkim narodom.

III PROCJENA FINANSIJSKIH SREDSTAVA POTREBNIH ZA SPROVOĐENJE REZOLUCIJE

Za sprovođenje ove rezolucije nisu potrebna dodatna finansijska sredstva u budžetu Republike Srbije.

IV RAZLOZI ZA DONOŠENJE PO HITNOM POSTUPKU

Donošenjem Rezolucije od strane Generalne skupštine UN-a, pravnosnažnih presuda Međunarodnog suda pravde i Međunarodnog krivičnog suda za bivšu Jugoslaviju, Međunarodnog rezidualnog mehanizma za krivične sudove u Hagu te njihovim prihvatanjem i poštovanjem, stvoreni su potrebni uslovi da se usvajanjem ove Rezolucije personalizuje odgovornost i krivica za počinjen genocid, kao i ulogu osuđenih ratnih zločinaca u udruženom zločinačkom poduhvatu.